

Sentupada cugl uors a Plaun Pigniel

15avel Kino Open Air a Sagogn

■ (cp) Als Gis da film a Soluturn han ins viu dapertut igl uors. E la pressa ha commentau quei en numerus posiziuns. Dapi ch'il film ei cumpariu ha el dau da discutir. Tuttavia buca negativ. Il film ch'ei ina praula ha augmentau la simpatia che biars han per quella creatira maiestusa. Sonda proxima, ils 22 da zercladur presenta l'uniun Pro Sagogn il film «Clara und das Geheimnis der Bären» en liug idillic amiez igl uaul. En cuort envida l'uniun Pro Sagogn la populaziun per la 15avla gada al cinema sut tschiel aviert. Ils emprems diesch onns ha ina cooperaziun cugl anteriur Club da film da Glion giu liug. Cun quell'uniun han ils da Sagogn mussau differents films europeics da renum, e quei cul projectur nostalgic. Oz ei quei deplorablamein buca pli pusseivel, persunter ha ei dau ina midada dil liug. La piazza da giugs e da famiglias Plaun Pigniel sur il vitg ei zun adattada per mussar films da famiglia e dalla natira. Aschia han ils organisateurs mussau igl onn vargau il film dils affons dil Napf ch'ei staus la stad vargada il hit dils kinos svizzers.

Per affons dad 8 onns ensi In gi sunter il solstezi da stad dat

la Pro Sagogn puspei l'entschatta dils kinos sut schiel aviert cul film da famiglia «Clara und das Geheimnis der Bären». Als Gis da film a Soluturn ha quella produziun svizra giu fetg buna critica e bia atenziun dallas medias. Il film ha connex cullas discussiuns actualas dalla simpatia ni antipatia ch'ins ha en Svizra pigl uors. Quella fascinonta creatira ei il protagonist ensemen cun Clara, la buoba da 13 onns. Quella viva cun sia mumma ed il bab nutrider sin in bein puril ellas muntognas grischunas. Clara ha retschiert duns specials, ella senta e vesa caussas ch'ei zuppadas per autra gliud. In gi scuviera ella sin ina pastira in pign uors. Lu entschiva la historia a ballantschar dil temps vargau el present. Clara ed il misteri dils uors colligia elements misterius e plein tensiun tier in film d'aventura cun bellezza maletgs. El s'adattescha per affons dad 8 onns ensi. Denter auter han ils mieds da massa commentau suandontamein il cuntegn dil film: «Ina mischeida da tensiun, mistica, aventura e siemi, accumpignau ed inscenu musicalmeins, cun registraziuns impressiunontas da cuntradas e d'animals.» Vinavon commentescha ina gasetta: «In veritabel film da famiglia, sco quei ch'ei dat deplorablamein bia memia pauc.»

Ed in'otra scriva: «In film cun grond respect avon la forza da tarlas historias», plinavon «La buoba carina ed igl uors curtesivel» ni «Presentaziun ferma sc'in uors». Ils critichers da kino laudan il film cunzun perquei ch'el muossa la relaziun dil carstgaun en ina natira archaica.

Ils organisateurs dalla Pro Sagogn han ponderau gitg sch'els dueigien ir ella medema direziun sco igl onn vargau culs affons dil Napf. L'idilla dil plaz cull'atmosfera e l'elecziun dil film han decidiu e buca schau dubis ch'igl ei necessari da mussar quei film sut tschiel aviert.

Il 15avel Kino Open Air da Sagogn ha puspei liug cun preschientscha da protagonistes e responsabels dalla produziun. Uonn eis ei gartegiau d'engaschar igl autur dil libret. Jan Poldervaart ei presents a Sagogn. Avon ch'il film vegn projectaun ha in discuors cun el liug.

Il 15avel Kino Open Air Sagogn ha liug sonda, ils 22-6-2013 allas 21.30, Plaun Pigniel sur il vitg. Avertura dil plaz allas 19.00. Allas 20.00 beinvegni ed introducziun cun Jan Poldervaart. Pusseivladad da parcar igl auto el vitg. Spassegia da 10 minutas tochen al liug, igl access ei signalisau. Cussegliabel eis ei da prender ina cozza da launa encunter il frestg dalla notg ed ina pintga cazzola pil return. Da marcort'aura ha la notg da kino liug ella halla polivalenta dalla casa da scola.



La pastira da Plaun Pigniel sur il vitg da Sagogn ei dapi generaziuns liug da sentupada per fiastas da tut gener. Dapi zacons onns vegn era organisau cheu ina notg da kino sut tschiel aviert.


L'AURA

Sulegl e fitg chaud

Situaziun generala: Ina pressiuun bassa sur l'Atlantic sa sposta vers la Peninsula iberica. Dal sidvest maina quella pressiuun bassa aria pli chauda vers las Alps. Ultra da quai procura il favugn en las Alps per temperaturas miaivlas.

Oz: Aura da stad empernaivla e fitg chaud. La damaun en il nord temperaturas da 15 fin 20 grads e durant il di da 32 fin 35 grads. En las muntognas lev vent dal nord e vers saira intgins temporals.

Prognosa: Mesemna e gievgia aura da bellezza cun temperaturas agreablas fin 34 grads.



Cantus Firmus Surselva ed Ensemble vocal Incantanti

■ (mc) Sonda passada han ils dus emsembles vocals Cantus Firmus Surselva (dirigent Clau Scherrer) e l'Ensemble vocal In-

cantati (dirigent Christian Klucker) concertà cuminaivlamain en la baselgia da la s. Crusch a Cuir. Per il punct culminant

da quest concert ha la nivla tonala «Sleep» da Eric Whitacre procurà en la baselgia cun ina acustica excellenta.

NOVITADS WWW.RTR.CH

Alois Vinzens per barat d'infurmaziuns automatic

La Banca Chantunala Grischuna beneventa il barat d'infurmaziuns automatic. Alois Vinzens, il directur general da la Banca Chantunala Grischuna, è persvadì che dar si il secret da banca envers l'exteriur saja l'unica schliaziun. Quai ha ditg Vinzens en in'intervista cun la gasetta «Schweiz am Sonntag». Sunter che la taglia d'indemnisaziun haja fatg naufragi na vesia el nagina alternativa tar il barat d'infurmaziuns automatic ch'è vegni preschentà venderdi d'ina gruppa d'experts.



Il schef d'armada André Blattmann en visita en il Grischun.

Avegnir da l'armada en Grischun

L'armada sto sut circumstanzas spargnar, perquai ha il chantun Grischun uss tema ch'i vegnia puspè stritgà plazzas. Sco gia avant 8 onns cura che radund 60 plazzas eran vegnidas stritgadas. Perquai è la regenza grischuna uss sa drizzada directamain al cussegl federal per gia da bell'entschatta far cler quant impurtanta che l'armada è per il Grischun. Il schef da l'armada André Blattmann ed er il cussegl federal han per-

quai gia uss confermà che las plazzas d'armas Cuir, Luzisteig e Valragn restian segiramain. Er quinta André Blattmann ch'i vegnia prendi resguard sin quels chantuns ch'han gia patì ils davos onns. I dettia dentant nagina garanzia, di André Blattmann vinavant. El, il cussegl federal ed er la regenza grischuna stettian en scadin cas en stretg contact per chattar ina schliaziun optimala per il Grischun.

FRINA FA PERINA 3

GIUVNETETGNA CADÌ

